



Sumáriu Kazu
Tribunál Judisiál Primeira Instánsia Baukau
Jullu 2024

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Baukau

1. Totál kazu ne'ebé JSMP monitoriza: 15¹

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (VD) no tipu ilísitu sira kona-ba VD	6
Artigu 146 Kódigu Penál (KP) no artigu 146 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD) artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade física grave no ofensa ba integridade física simples ho natureza violénsia doméstika no arma brankas	1
Artigu 154 KP no artigu 2, 3, 35 no 36 (LKVD)	Maus-tratus ba kónjuje	3
artigu 177 (1) KP no artigu 104 KP	Abuzu seksuál ba menór	1
artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Arma brankas	1

¹ Totál kazu 15 ne'e la representa totál kazu ne'ebé Tribunál Judisiál Primeira Instánsia Baukau julga iha fulan Jullu 2024.

Artigu 258 Kódigu Penál (KP) artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Danu simples no arma brankas	1
Artigu 261 (KP)	Uzurpasaun imovel	1
Artigu 258 Kódigu Penál (KP)	Danu simples	1
Totál		15

2. Totál desizaun ne'ebé JSMP monitoriza: 11

Tipu desizaun	Artigu	Númeru
Pena prizaun ho indemnizasaun sivíl	Artigu 66	1
Pena prizaun	Artigu 66	1
Suspensaun ba prizaun nia ezekusaun	Artigu 68 KP	5
Pena multa	Artigu 67 KP	2
Absolve		2
Totál		11

3. Totál kazu sira ne'ebé adia tuir JSMP nia monitorizasaun: 4

4. Totál kazu ne'ebé sei kontinua prosesu tuir JSMP nia monitorizasaun: 0

B. Deskrisaun sumáriu julgamentu ba desizaun kazu sira

1. Krime uzurpasaun imovel

Nú. Prosesu : 0065/22. PDBAU
 Kompozisaun Tribunál : Singulár
 Juisa : Dra. Maria Modesta d. A. Viera
 Prokuradór : Dr. Bartolomeu de Araújo
 Defeza : Dr. Grigório M. L. de Lima
 Desizaun : Absolve

Iha 02 Jullu 2024, Tribunál Judisiál Primeira Instáncia Baukau prezide julgamentu leitura sentensa ba krime uzurpasaun imovel ne'ebé envolve arguidu Luis de Camoes hasoru ofendidu Caitano Amaral, iha Munisípiu Vikeke.

Akuzasaun Prokuradór

Prokuradór akuza katak, rai no natar ai-tarak oan no kailara ne'ebé lokaliza iha aldeia Mauki'ak Suku Matahoi ne'e partense ba ofendidu nian, bazeia ba sentensa tribunál nian, iha 21 Janeiro 2022, iha oras tuku 08:00 dadeer, ofendidu hamutuk ho nia oan naran Luis ba natar ai-tarak oan kee be dalan atu halo natar iha ai-tarak oan maibé arguidu mai halo impedimentu no arguidu taka tiha bee refere no dehan ó la iha direitu halo natar iha ne'e no ó lori tribunál

nia naran mós hau la ta'uk momentu ne'e arguidu kaer ho katana iha liman nune'e ofendidu ho nia oan ta'uk hodi fila tiha.

Tuir mai iha 23 Feveiru 2022, tuku 09:00 dadeer ofendidu ho nia oan nafatin ba natar ai-tarak oan haree arguidu nafatin okupa natar no halo lutu haleu natar refere nune'e ofendidu sobu tiha lutu refere, arguidu ba haree lutu sobu tiha ona, arguid ba fó hatene Sr, Miguel do Rosario katak horseik ofendidu mak iha karik, nia mak mate se lae hau mak mate.

Prokuradór akuza arguidu kontra artigu 261 KP kona-ba uzurpasaun ba imovel ho nia moldura penál tinan 1 to'o tinan 4.

Produsaun ba prova sira

Iha prosesu julgamentu, arguidu deklara katak iha 21 Janeiru 2022, halo impedimentu bainhira ofendidu ho nia oan ke'e bee atu tau fali ba arguidu nia natar. Arguidu dehan ó la iha direitu ba natar ne'e, arguidu dehan ó lori naran tribunál mós hau la ta'uk. Iha 23 Feveiru 2022, arguidu haree nia lutu ne'ebé haleu natar ne'e naksobu hotu ne'e mak arguidu ba informa ba xefe aldeia, xefe suku no Polísia Eskuadra Uatulari. Arguidu deklara tan katak durante ne'e ofendidu ho Sr. Duarte mak iha disputa kona-ba natar ne'ebé baliza ho arguidu nia natar, prosesu disputa natar entre ofendidu ho Sr. Duarte ikus ofendidu mak manan ba natar fatin ne'e hosi Sr. Duarte, bainhira tribunál ba sukat ofendidu sukat mós arguidu nia natar ne'e mak arguidu nervozu to'o problema ne'e akontese.

Iha parte seluk ofendidu, deklara katak iha 21 Janeiru 2022, ofendidu ho nia oan ba natar atu ke'e bee hodi tau ba natar ai-tarak oan mak arguidu ba halo impedimentu dehan labele tau bee ba natar refere. Iha 23 Feveiru 2022 ofendidu ba haree lutu haleu ona natar ne'e mak ofendidu nervozu sobu tiha lutu refere hafoin ba hato'o keixa iha Polísia Eskuadra Uatulari.

Testemuña Luis Soares nu'udar ofendidu nia oan mane depoimentu katak momentu hamutuk ho ofendidu ba natar no loke bee ba natar derepente arguidu mai impede hodi dehan labele loke bee no labele halo natar *“ó la iha direitu ba natar refere, ó lori tribunál nia naran mós hau la ta'uk”*. Nune'e testemuña ho ofendidu fila ba uma hodi evita problema seluk.

Alegasaun finál

Prokuradór haktuir katak arguidu impede duni ofendidu hodi labele halo natar ne'ebé ofendidu manan ona hosi tribunal liuhosi prosesu sivil, arguidu nia aktu ne'e halo ofendidu ta'uk la halo ona natar refere to'o agora no reforsa mós hosi testemuña nia deklarasaun perante tribunál, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak iha produsaun ba prova arguidu konfesa taka duni bee tanba ofendidu tau fali b aba arguidu nia natar, arguidu nu'udar agrikultór, rezultadu hodi sustenta de'it ba família, ho nune'e husu ba tribunál fó pena justu ba arguidu.

Desizaun

Depoisde avalia faktu sira hotu, tribunál konsidera faktu sira la suficiente hodi prova katak arguidu komete krime ne'ebé imputa ba arguidu, tanba natar refere nia prosesu sei iha tribunál no seidauk hatene se mak iha direitu ba natar refere, nune'e tribunál konklui prosesu ne'e no absolve arguidu hosi prosesu ne'e.

2. Krime ofensa ba integridade física grave no ofensa ba integridade física simples ho natureza violência doméstica no arma brankas

Nú. Prosesu : 0049/23. VQUCB
Kompozisaun Tribunál : Singulár
Juis : Dr. José António d. Escurial no Dra. Maria Modesta d. A. Viera no Dra. Sribuana da Costa
Prokuradór : Dr. Julio da Silva Correia
Defeza : Dr. António Fernandes
Desizaun : Pena prizaun tinan 10

Iha 03 Jullu 2024, Tribunál Judisiál Primeira Instánsia Baukau prezide leitura akordaun ba krime ofensa ba integridade física grave no ofensa ba integridade física simples ho natureza VD no arma brankas ne'ebé envolve arguidu PF hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 24 Novembru 2023, iha oras tuku 08:00 dadeer, iha sira nia kuartu laran arguidu buti ofendida nia kakorok dudu monu ofendida ba kama leten nune'e ofendida tenta atu halai sai hosi kuartu laran, arguidu foti katana taa dala ida iha ofendida nia liman parte loos kontinua taa iha ofendida nia liman parte karuk, tanba ne'e ofendida hakilar katak "*hau mate ona*," mezmu nune'e arguidu kontinua taa iha ofendida nia ain parte loos no parte karuk ofendida haku'ak arguidu nia ain hodi husu perdaun maibé arguidu kontinua taa iha ofendida nia ain. Antes agresaun ne'e, arguidu ho lezada diskute malu kona-ba arguidu haree ofendida nia foto grafia iha média sosial.

Antes ne'e iha loron no fulan ne'ebé la apuradu maibé iha tinan 2020, sein motivu ne'ebé klaru arguidu lori katana nia belar baku iha ofendida nia kotuk laran. Iha loron no fulan ne'ebé haluha ona maibé iha tinan 2022, sein motivu arguidu tuku dala barak iha ofendida nia kelen, arguidu taa ofendida maibé la kona tanba ofendida ses tiha nune'e arguidu taa kona fali didi lolon

Prokuradór akuza arguidu kontra artigu 145 KP kona-ba ofensa ba integridade física simples (hamutuk krime rua) ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD. kontra artigu 146 (b) no (e) KP kona-ba ofensa ba integridade física grave ho moldura penál tinan 2 to'o tinan 8 no artigu 2, 3(a), 35(b) no 36 LKVD. Kontra artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklarata katak iha akontesimentu ne'e arguidu ho lezada diskute malu kona-ba ofendida atu ba tuir treinamentu, maibé

arguidu nia hakarak ofendida la bele ba tuir treinamentu refere tanba sira nia oan atu tuir ezame ema hein la iha, no ofendida hatan katak "*la bele manda hau ó tenki tuir*", no ofendida foti katana iha kulsaun okos arguidu ho lezada konsege hadau malu katana no arguidu foti hosi lezada hodi taa dala rua iha ofendida nia liman no kontinua taa lezada, maibé arguidu la hatene tuir taa kona ofendida nia isin parte ne'ebé. Kona-ba akontesimentu iha tinan 2020, arguidu konfesa faktu hotu iha akuzasaun no kona-ba akontesimentu iha tinan 2022, iha momentu ne'eba ofendida toba mak arguidu baku book lezada nia ain atu lezada hadeer hodi fó arguidu nia rounpa, tanba arguidu atu haris. Arguidu deklarara liután katak arrepende ninia hahalok, forma família iha tinan 2013, iha oan nain lima foin primeiravés mai hatan iha tribunál, arguidu iha hela prizaun preventiva la iha família ruma mak ba vizita no arguidu mak uniku sustenta família.

Alende ne'e, lezada kontinua konfirma faktu hotu iha akuzasaun no deklarara katak, agora dadauk lezada nafatin halo tratamentu iha HNGV Dili.

Alegasaun finál

Prokuradór haktuir katak iha produsaun ba prova arguidu konfesa faktu hotu iha akuzasaun no lezada mós konfirma faktu hotu iha akuzasaun, arguidu nia aktu ne'e rezulta hetan kanek ne'ebé grave no hosi arguidu nia aktu ne'e ofendida agora la halo ona serbisu hanesan antes, tanba ne'e husu ba tribunál atu kondena arguidu ho pena únika tinan sanulu iha kadeia.

Entretantu, defeza haktuir katak bazeia ba produsaun ba prova arguidu konfesa, arrepende ba ninia hahalok no foin primeiravés mai hatan iha tribunál, kona-ba dezisaun parte defeza entrega ba tribunál hodi fó pena ne'ebé justu ba arguidu.

Desizaun

Depoisde avalia faktu sira hotu, tribunál prova katak faktu sira iha akuzasaun ne'e provadu hotu bazeia ba arguidu nia deklarasaun no ofendida nia konfirmasaun ba akuzasaun.

Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ba kazu ofensa integridade fizika simples ho natureza VD ne'ebé akontese iha 2020, ho pena prizaun tinan ida, kondena arguidu ba ofensa integridade fizika simples ho natureza VD ne'ebé akontese iha 2022, ho pena prizaun tinan ida, kondena arguidu ba krime ofensa ba integridade fizika grave ho pena prizaun tinan 8 no kondena arguidu ba krime arma brankas ho pena prizaun tinan tolu. Tribunál halo akumulasaun ba pena hodi aplika pena únika tinan sanulu prizaun.

3. Krime maus-tratus ba kónjuje

Nú. Prosesu	: 0014/22.BCEVN
Kompozisaun Tribunál	: Koletivu
Juis	: Dra. Sribuana da Costa, Dr. José António d. Escurial no Dra. Maria Modesta d. A. Viera
Prokuradór	: Dr. Ambrósio Rangel Freitas

Defeza : Dr. Albino de Jesus Perreira
Desizaun : Pena prizaun tinan 2 suspende ba tinan 2

Iha 08 Jullu 2024, Tribunál Judisiál Primeira Instánsia Baukau prezide julgamentu leitura akordaun ba krime maus-tratus ba kónjuje ne'ebé envolve arguidu AdCC hasoru nia feen, iha Munisípiu Baukau.

Akuzasaun Prokuradór

prokuradór akuza katak iha 26 Juñu 2023, iha oras tuku 11:00 meiodia, arguidu tuku dala rua iha lezada nia ulun, no tuku dala ida iha lezada nia tilun hun no arguidu nia aman duni lezada sai hosi uma nune'e lezada ho oan ki'ik oan ba tiha merkadu hein kareta hafoin arguidu ba tuir hodi tuku dala rua iha lezada nia ulun no rasta ofendida nia liman. Antes agresaun ne'e, lezada ho arguidu nia aman istori malu no arguidu nia aman informa ba arguidu katak lezada tolok arguidu nia aman ho nune'e mosu agresaun ne'e.

Antes ne' iha loron no fulan ne'ebé arguidu haluha maibé iha tinan 2018, iha oras tuku 11:00 meiodia arguidu tebe dala ida iha lezada nia kidan no basa dala ida iha lezada nia hasan parte karuk, maibé lezada la ba hato'o keixa.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a), 35 (a) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese ikus sira di'ak malu ona, arrepende ninia hahalok, foin primeiravés mai hatan iha tribunál no arguidu mós nu'udar agrikultór la iha rendimentu fiksi.

Alende ne'e, lezada kontinua konfirma faktu hotu iha akuzasaun no deklara mós katak depoisde akontesimentu ne'e ikus sira di'ak malu ona no to'o agora la baku ona lezada.

Alegasaun finál

Prokuradór haktuir katak arguidu konfesa faktu sira iha akuzasaun, lezada konfirma akuzasaun katak arguidu halo tratamentu kruek hasoru lezada, mezmu sira di'ak malu ona, mezmu nune'e atu prevene arguidu la repete tan ninia hahalok ne'e iha futuru no ema seluk labele halo tuir arguidu nia hahalok ne'e, husu ba tribunál atu kondena arguidu ho pena prizaun tinan rua suspende ba tinan rua.

Entretantu, defeza haktuir katak, arguidu konfesa, di'ak malu ona no arrepende ona ninia hahalok. Tanba ne'e husu ba tribunál atu diside tuir kompetensia tribunál nian.

Desizaun

Depoisde avalia faktu sira hotu, tribunál prova katak iha 26 Juñu 2023, arguidu tuku dala rua iha ofendida nia ulun, tuku dala ida iha tilun hun no kontinua tuku dala rua iha lezada nia ulun no rasta ofendida nia liman, iha loron no fulan

haluha, maibé iha tinan 2018, arguidu tebe dala iha ofendida nia kidan no basa dala ida iha ofendida nia hasan parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

4. Krime maus-tratus ba kónjuje

Nú. Prosesu : 0050/23. BCQLC
Kompozisaun Tribunál : Koletivu
Juis : Dra. Sribuana da Costa, Dr. José António d. Escurial no Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Albino de Jesus Perreira
Desizaun : Pena prizaun tinan 2 suspende ba tinan 2

Iha 08 Jullu 2024, Tribunál Judisiál Primeira Instánsia Baukau prezide leitura akordaun ba krime maus-tratus ba kónjuje ne'ebé envolve arguidu FM hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 17 Novembru 2023, iha oras tuku 19:00 kalan, arguidu tuku dala dala ida iha lezada nia kakorok, tuku dala ida iha ulun, tuku dala ida iha reen-toos no tuku dala ida iha kabaas, basa dala ida iha hasan parte karuk no buti lezada nia ibun.

Antes ne'e iha loron ne'ebé la apura maibé iha fulan Maiu 2023, arguidu uza ai-baku dala ida iha lezada nia ain maibé ofendida la hato'o keixa.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a) no 35 (a) no 36 LKVD.

Produsaun ba prova sira

Iha prosesu julgamentu arguidu deklarata katak iha 17 Novembru 2023, kalan boot ona lezada seidauk tama uma, arguidu nervozu ba bolu lezada mai uma hodi basa dala rua iha lezada nia hasan no basa dala rua iha lezada nia kanuruk, kona-ba akontesimentu iha fulan Maiu 2023, arguidu ba halo kantadeiru tomate nian, fila mai uma ofendida la prepara hahan ne'e mak arguidu hirus foti ai-baku dala ida iha lezada nia ain.

Alende ne'e, lezada kontinua konfirma faktu sira iha akuzasaun no deklarata katak depoisde akontesimentu segundu ne'e lezada deside lakohi moris hamutuk ona ho arguidu.

Alegasaun finál

Prokuradór haktuir katak arguidu konfesa parsialmente ba faktu iha akuzasaun katak basa de'it no la tuku lezada, maibé lezada kontinua konfirma faktu hotu iha akuzasaun. Mezmu arguidu ho lezada la moris hamutuk ona maibé atu

prevene arguidu repete tan ninia hahalok ne'e iha futuru no karik iha tempu ruma arguidu hola fali fetu seluk atu labele halo tan agresaun hanesan, tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu, defeza haktuir katak arguidu deklarade'it faktu ne'ebé nia komete, nune'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu sira hotu, tribunál prova katak 17 Novembru 2023, arguidu tuku dala ida iha lezada nia kakorok, tuku dala ida iha ulun, tuku dala ida iha reen-toos no tuku dala ida iha kabaas, basa dala ida iha hasan parte karuk no buti lezada nia ibun, prova mós katak iha fulan Maiu 2023, arguidu uza ai baku dala ida iha ofendida nia ain.

Bazeia ba faktu provadu sira ne'e no tetu mós ho sirkunstánsia hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

5. Krime maus-tratus ba kónjuje

Nú. Prosesu	: 0234/23.BCBCV
Kompozisaun Tribunál	: Koletivu
Juis	: Dra. Maria Modesta d. A. Viera no Dr. José António d. Escurial no Dra. Sribuana da costa
Prokuradór	: Dr. Bartolomeu de Araújo
Defeza	: Dr. Sidónio Maria Sarmiento
Desizaun	: Pena prizaun tinan 2 suspende ba tinan 2

Iha 09 Jullu 2024, Tribunál Judisiál Primeira Instánsia Baukau prezide leitura akordaun ba krime maus-tratus ba kónjuje ne'ebé envolve arguidu RXFdC hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 29 Outubru 2023, iha oras tuku 19:35 kalan, arguidu basa dala rua iha lezada nia kanuruk, tuku dala ida iha lezada nia kanuruk no tebe dala ida iha lezada nia ain parte karuk rezulta lezada monu ba rai, arguidu kontinua tuku dala ida iha lezada nia ulun, kaer no rasta lezada nia liman hodi dada ba liur hodi tuku dala ida iha lezada nia kotuk laran. Arguidu mós sempre halo agresaun bei-beik hasoru lezada mezmú loron no fulan haluha ona maibé iha tinan 2019 no tinan 2022, arguidu halo agresaun hasoru lezada, maibé lezada nungka apresenta keixa hasoru arguidu no antes ne'e bainhira arguidu hemu tua lanu sempre halo problema ho lezada.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok, di'ak malu ona no promete iha futuru sei la komete tan krime

hasoru lezada. Arguidu deklara mós katak bainhira arguidu hemu tua lanu sempre istori malu ho lezada no dala ruma halo agresaun hasoru lezada, depoisde akontesimentu ikus arguidu la baku ona lezada no arguidu nu'udar guarda Munisípiu ho vensimentu kada fulan US\$155.00.

Alende ne'e, lezada kontinua konfirma faktu hotu iha akuzasaun no konfirma mós ho arguidu nia deklarasaun katak arguidu lanu sempre halo problema ho lezada, depoisde akontese ikus di'ak malu ona no to'o agora la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun no lezada mós konfirma ho akuzasaun, nune'e prokuradór konsidera arguidu provadu komete krime maus-tratus ba kónjuje hasoru lezada. Tanba ne'e, husu ba tribunál atu kodena arguidu ho pena prizaun tinan rua suspende ba tinan rua.

Entretantu, defeza haktuir katak arguidu konfesa faktu hotu iha akuzasaun, arrepende ninia hahalok, foin primeiravés mai hatan iha tribunál, kona-ba pena parte defeza konkorda prokuradór ninia alegasaun.

Desizaun

Depoisde avalia faktu sira hotu, tribunál prova katak 29 Outubru 2023, arguidu basa dala rua iha ofendida nia kanuruk, tuku dala ida iha kanuruk, tebe dala ida iha ofendida nia ain parte karuk, tuku dala ida iha ulun, kaer no rasta ofendida nia liman hodi dada ba liur no kontinua tuku dala ida iha kotuk laran. Arguidu mós antes ne'e sempre halo agresaun bei-beik hasoru ofendida mezmu loron no fulan ne'ebé ofendida haluha ona maibé iha tinan 2019 no tinan 2022, maibé ofendida nunca apresenta keixa no prova mós katak antes ne'e arguidu hemu tua lanu sempre halo problema ho ofendida.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu konfesa, arrepende ninia hahalok, di'ak malu ona no promete iha futuro sei la komete tan krime hasoru lezada, nune'e tribunál konklui prosesu ne'e no kondena arguidu ba pena prizaun tinan rua suspende ba tinan rua.

6. Krime ameasa no arma brankas

Nú. Prosesu	: 0121/23. BCBCV
Kompozisaun Tribunál	: Koletivu
Juis	: Dra. Maria Modesta d. A. Viera no Dr. José António d. Escurial, Dra. Sribuana Costa
Prokuradór	: Dr. Bartolomeu de Araújo
Defeza	: Dr. Albino de Jesus Perreira
Desizaun	: Absolve

Iha 12 Jullu 2024, Tribunál Judisiál Primeira Instánsia Baukau prezide leitura akordaun ba krime ameasa no arma brankas ne'ebé envolve arguidu Alberto Ribeiro hasoru Joana da Silva no Estadu RDTL, iha Suku Tirilolo Postu Baukau Vila, Munisípiu Baukau.

Akuzasaun Prokuradór

Prokuradór akuza katak iha 30 Juñu 2023, iha oras tuku 18:00 lokraik, arguidu utiliza katana halo limpeza iha kintal no sunu foer iha nuu hun, bainhira lezada ko'alia netik dehan labele sunu, arguidu hatan "*ó mangame hau taa iha ó nia orgaun sensitivu*", nune'e halo lezada ta'uk kontinua ba hato'o keixa iha polísia.

Prokuradór akuza arguidu kontra artigu 157 KP kona-ba ameasa no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklara katak momentu arguidu taa ai-funan iha uma leten no dasa hamutuk hodi sunu iha nuu nia sorin la'os sunu iha nuu hun derepente lezada ho nia la'en ho motor to'o mai arguidu nia uma oin mak hakilar no tolok arguidu maibé arguidu nonok de'it, arguidu la uza katana ameasa lezada, arguidu mós deklara katak antes ne'e sira iha ona problema kona-ba rai no to'o agora ninia prosesu iha ona tribunál.

Alende ne'e lezada deklara katak arguidu hamós foer sunu iha lezada nia nuu hun ne'e mak lezada ko'alia netik arguidu ho katana amesa dehan "*ó mangame hau taa iha ó nia orgaun sensitivu*", lezada ta'uk ba hato'o keixa iha Polísia Eskuadra PNTL Baukau Vila. Lezada mós deklara katak antes ne'e sira iha ona problema kona-ba rai no ninia prosesu iha ona tribunál.

Testemuña Joni do Santos nu'udar mane foun depoimentu katak momentu tuur iha uma oin mak haree arguidu kaer katana no sunu foer iha nuu hun, maibé testemuña tama tiha ba uma laran tanba feen oan nurak. Kona-ba hakilar tolok ameasa malu ho katana testemuña la iha kuñesementu.

Testemuña Gabriela Gaiu nu'udar lezada nia kuñada depoimentu katak momentu rona sira istori malu ne'e mak testemuña halai ba, derepente arguidu mai lezada nia diresaun ne'e mak testemuña mós ta'uk halai tiha tanba rai kalan ona.

Alegasaun finál

Prokuradór haktuir katak lezada konfirma faktu sira iha akuzasaun no haree mós testemuña sira nia depoimentu iha audensia julgamentu, haree ba produsaun prova sira husu ba tribunál fó pena justu ba arguidu.

Entretantu, defeza haktuir katak bazeia ba produsaun ba prova, arguidu nia konduta la priense krime ameasa no arma brankas ne'ebé imputa ba lezada, tanba ne'e husu ba tribunál atu absolve arguidu hosi prosesu ne'e.

Desizaun

Depoizde avalia faktu sira hotu, tribunál konsidera faktu sira la suficiente hodi prova katak arguidu komete krime ne'e hanesan la iha testemuña mai deklara arguidu uza katana hodi ameasa ofendida, nune'e tribunál konklui prosesu ne'e no absolve arguidu hosi prosesu ne'e.

7. Krime ofensa ba integridade fízika simples ho natureza violénsia doméstika

Nú. Prosesu : 0004/24. BCBQI
Kompozisaun Tribunál : Singulár
Juisa : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Albino de Jesus Perreira
Desizaun : Pena multa US\$40.00

Iha 16 Jullu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu DJG hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha, 26 FEVEREIRU 2024, iha oras tuku 09:30 dadeer, arguidu rasta lezada nia fuuk ba kotuk no hanehan lezada ba iha rai. Antes ne'e, arguidu ho lezada diskute malu kona-ba sira nia oan feto halo be manas ba arguidu atu hemu no lezada mós dehan sona hudi ba ofendida han atu hemu ai-moruk tanba lezada moras, nune'e sira diskute malu mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak iha akontesimentu ne'e arguidu fila hosi haree karau to'o uma dehan ba oan feto atu kahur kafe mós lakohi no haruka lezada nu'udar feen mós lakohi, ne'e mak arguidu nervozu dada lezada nia fuuk ba kotuk no hanehan ba rai. Arguidu ho lezada forma família iha tinan 2001, iha oan hamutuk na'in sia foin primeiravés baku lezada no mai hatan iha tribunál, arrepende ninia hahalok no depoisde akontese to'o agora la baku ona lezada.

Alende ne'e, lezada konfirma faktu sira iha akuzasaun, depoisde akontese di'ak malu ona no akonetse to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime ofensa simples ho ninia natureza violénsia doméstika tanba lezada ne'e arguidu nia feen rasik, arguidu bele halo matabisu hanesan kahor kafe la'os lezada ho nia oan sira mak tenki halo ba arguidu atu prevene arguidu nia konduta iha futuru atu labele akontese tan, husu ba tribunál atu kondena arguidu ho pena multa.

Entretantu, defeza haktuir katak iha produsaun ba prova arguidu konfesa faktu hotu ne'ebe imputa ba nia, arrepende ba nia hahalok no foin primeiravés mai hatan iha tribunal, arguidu serbisu nu'udar agrikultór la iha rendimentu no arguidu mak sustenta nia família, nune'e parte defeza husu ba tribunál atu kondena arguidu ho pena admoestasaun.

Desizaun

Depoisde avalia faktu hotu, tribunál prova katak arguidu rasta lezada nia fuuk ba kotuk no hanehan lezada ba iha rai.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu 0.50 sentavus kada loron durante loron 80. Tribunál mós fiksa pena alternativa durante loron 53 prizaun, bainhira arguidu la kumpri pena multa refere.

8. Krime abuzu seksuál ba menór

Nú. Prosesu : 0007/20.BCEVN
Kompozisaun Tribunál : Koletivu
Juis : Dr. José António d. Escurial, Dra. Sribuana Costa
no Dr. Maria Modesta d. A. Viera
Prokuradora : Dra. Remizia de Fátima da Silva
Defeza : Dr. Sidónio Maria Sarmento
Desizaun : Pena prizaun tinan 10 ho indemnizasaun sivíl
US\$1,000.00

Iha 17 Jullu 2024, Tribunál Judisiál Primeira Instánsia Baukau prezide leitura akordaun ba krime abuzu seksuál ba menór ne'ebé envolve arguidu TdJX hasoru lezada ho idade tinan 13 fulan 2, iha Munisípiu Baukau.

Akuzasaun Prokuradora

Prokuradora akuza katak iha 05 Agostu 2020, iha ora stuku 15:00 loraik, lezada tuur iha uma varanda konta istoria halimar ho nia maun, nune'e arguidu mós mai tan sira hodi konta halimar istoria ho lezada no lezada nia maun, no bainhira sira konta hela istoria lezada nia maun ba karega telefoñe iha viziñu nia uma ho distansia ne'ebé dook uituan. Nune'e arguidu ho lezada mesak de'it, arguidu uza liman hodi halo sinal relasaun seksuál no hatudu ba lezada maibé lezada hateten ba arguidu katak "*hau ta'uk hau nia inan no aman*" arguidu hateten ba lezada katak "*ó nia inan-aman bain rua hanesan ne'e mak fila,*" arguidu kontinua bolu no obriga lezada tama ba kuartu laran, arguidu haruka lezada hasai lezada nia rounpa no arguidu mós hasai nia rounpa arguidu haruka lezada toba sae iha hadak leten hodi halo relasaun seksuál ho lezada. Lakleur lezada rona nia inan to'o mai lezada hatais nia kalsa hodi halai sai ba varanda, haree ofendida ho kondisaun ta'uk ne'e mak nia inan husu tuir "*ó halo saida?*" lezada hatan hau nia ulun mak moras. Depois lezada nia inan tama ba kuartu laran buka xave mak haree hetan arguidu ho kondisaun la hatais kalsa tuur subar-an iha bidon kotuk, ofendida nia inan hakfodak husu ba arguidu "*halo saida iha uma laran ne'e?*" Primeiru arguidu bosok tiha dehan hau tuur de'it iha uma laran, depois arguidu dehan tan katak "*be ida karik fakar tiha ona no hanesan naokten ida karik nia nain toman ona*".

Alende ne'e ho komportamentu hirak ne'ebé hakerek tiha ona, arguidu la provoka deit moras iha ofendida nia isin maibé ofendida lakon ninia dignidade, hamoe nia iha comunidade, kolega no família, falta respeito ba nia no estraga

nia futuru nune'e hamosu responsabilidade hodi selu danu morál ne'ebé kalkula no reklama ho osan ho valor US\$2,000.00 ba ofendida.

Prokuradora akuza arguidu kontra artigu 177 (1) KP kona-ba abuzu seksuál ba menór ho moldura penál tinan 5 to'o tinan 15 no artigu 104 KP kona-ba responsabilidade sivil.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu, arrepende ninia hahalok, foin primeiravés mai hatan iha tribunál arguidu nu'udar veteranu simu osan subsidu kada fulan US\$270.00.

Alende ne'e, lezada kontinua konfirma faktu sira iha akuzasaun no deklara katak iha akontesimentu ne'e lezada ho nia inan mak ba hato'o keixa iha Eskuadra PNTL Venilale, depoisde akontesimentu lezada ba hela iha uma-mahon to'o agora.

Alegasaun finál

Prokuradora haktuir katak arguidu konfesa rasik faktu sira ne'ebé nia komete, lezada konfirma, ba kazu ida ne'e ameasa ga la ameasa mak halo relasaun seksual mós nafatin krime tanba lezada menór foin mak atinji tinan 13 fulan 2, arguidu nia aktu ne'e lei bandu no arguidu nia aktu ne'e lezada ta'uk ba hela iha uma-mahon to'o agora, tanba ne'e, husu ba tribunál atu kondena arguidu ho pena prizaun tinan sanulu.

Entretantu defeza haktuir katak arguidu konfesa, kolabora di'ak ho tribunál hodi la difikulta tribunál atu hetan verdade, arrepende ninia hahalok, foin primeiraves mai hatan iha tribunál no arguidu mós idade ona, tanba ne'e husu ba tribunál aplika pena minimu hosi krime ne'e ba arguidu no redus mós indemnizasaun sivil ba arguidu tanba arguidu mak sei tau matan ba nia família.

Desizaun

Depoisde avalia faktu hotu, tribunál konsidera faktu faktu hotu provadu bazeia ba konfisaun arguidu nian no konfirma mós hosi lezada.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan sanulu no selu mós indemnizasaun sivil ba lezada ho valor osan US\$1,000.00

9. Krime ofensa ba integridade fízika simples ho natureza violénsia doméstika

Nú. Prosesu	: 0076/23. PDBAU
Kompozisaun Tribunál	: Singulár
Juisa	: Dra. Maria Modesta d. A. Viera
Prokuradór	: Dr. Bartolomeu de Araújo
Defeza	: Dra. Laura Valente Lay
Desizaun	: Pena multa US\$45.00

Iha 18 Jullu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza VD ne'ebé envolve arguidu MSS hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha, 08 Agostu 2023, iha oras tuku 01:00 madrugada arguidu tuku dala rua iha ofendida nia ulun, rezulta oin nakukun no arguidu mós sama lezada nia kelen parte loos no arguidu mós duni sai lezada no sira nia oan na'in rua atu sai hosi uma. Antes ne'e, arguidu ho lezada diskute malu kona-ba sira nia oan ki'ik oan na'in rua tanis iha kalan boot mak lezada fanu arguidu atu kous labarik sira, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak 08 Agostu 2024, iha oras tuku 01:00 madrugada, sira nia oan nain rua tanis hotu arguidu dada ofendida nia fuuk no sama ofendida nia kelen ho intensaun fanu atu hadeer hodi haree labarik sira tanis iha kalan boot maibé lezada toba nafatin ne'e mak arguidu nia inan hadeer mai ko'us tiha labarik sira maibé lezada toba nafatin to'o tuku 06:00 dadeer hadeer, lezada ko'us labarik na'in rua ba liu nia inan aman nia uma, arguidu rona lezada ho oan na'in rua ba ona Dili. Arguidu mós deklara katak di'ak malu ona ho lezada, arrepende ninia hahalok no durante forma família iha tinan 2021, foin primeiravés baku lezada no mai hatan iha tribunál.

Alende ne'e, lezada kontinua konfirma faktu hotu iha akuzasaun no deklara katak di'ak malu ona ho arguidu no to'o agora arguidu la komete tan krime seluk hasoru lezada.

Alegasaun finál

Prokuradór haktuir katak mezmú arguidu deklara parsial maibé lezada konfirma akuzasaun katak arguidu halo agresaun hasoru lezada, karik arguidu la halo agresaun lezada la sai hosi uma no la apresenta keixa, nune'e atu prevene arguidu nia konduta iha futuru atu labele akontese tan, husu ba tribunál atu kondena arguidu ho pena prizaun fulan ida suspende ba tinan ida.

Entretantu, defeza haktuir katak iha produsaun ba prova arguidu deklara katak dada ofendida nia fuuk no sama nia kelen ho intensaun atu fanu ofendida, arrepende nia hahalok no foin primeiravés mai hatan iha tribunál, tanba ne'e husu ba tribunál atu fó dezisaun ne'ebé justu ba arguidu.

Desizaun

Depoizde avalia faktu hotu, tribunál prova katak arguidu tuku dala rua iha lezada nia ulun, arguidu mós sama lezada nia kelen parte loos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende ninia hahalok, di'ak malu ona ho lezada no foin

primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0.50 centavus kada loron durante loron 90. Tribunál mós fiksa pena alternativa durante loron 50 prizaun, bainhira arguidu la kumpri pena multa refere.

10. Krime ofensa ba integridade física simples ho natureza violénsia doméstika

Nú. Prosesu : 0040/22. BCBCV
Kompozisaun Tribunál : Singulár
Juisa : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Albino de Jesus Perreira
Desizaun : Pena prizaun fulan 2 suspende ba tinan 1

Iha 18 Jullu 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu FYG (edital) hasoru nia aman, iha Munisípiu Baukau.

Akuzasaun Prokuradór

Prokuradór akuza katak iha, 25 Jullu 2023, iha oras tuku 08:30 dadeer, arguidu aperta lezadu nia kamizola nia gola dada hodi dala rua rezulta moras no bubu iha lezadu nia isin. Antes ne'e, arguidu ho lezadu diskute malu kona-ba lezadu halo lakon osan ho valor US\$5,000.00.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3(c), 35(b) no 36 LKVD.

Produsaun ba prova sira

Tribunal julga arguidu ho editalmente tanba arguidu serbisu iha Australia.

Alende ne'e, lezadu deklara katak, arguidu husu tuir osan ho valor US\$5,000.00 ne'ebé lezadu halo lakon no ofendidu hatan osan ne'e hau nian nune'e arguidu hatan ho nervozu hodi kaer lezadu nia faru gola dada dala rua rezulta kakorok moras, arguidu nu'udar lezadu nia oan mane, di'ak malu ona no arguidu agoraserbisu iha Australia.

Alegasaun finál

Prokuradór haktuir katak mezmu julga arguidu ho editalmente maibé lezadu konfirma faktu ho integralmente, mezmu sira di'ak malu ona, maibé atu prevene arguidu nia konduta iha futuru atu labele akontese tan hahalok hanesan no hasoru ema seluk, husu ba tribunál atu kondena arguidu ho pena multa.

Entretantu, defeza haktuir katak haree ba produsaun prova iha audensia julgementu, entrega ba tribunal atu diside.

Desizaun

Depoisde avalia faktu hotu, tribunál prova katak arguidu aperta lezadu nia faru gola dada dala rua rezulta moras no bubu iha lezadu nia isin.

Bazeia ba faktu provadu sira ne'e, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

11. Krime arma brankas

Nú. Prosesu : 0042/22. LALPL
Kompozisaun Tribunál : Koletivu
Juis : Dra. Sribuana Costa no Dr. José António d. Escurial no Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. António Fernandes
Desizaun : Pena prizaun tinan 3 suspende ba tinan 3

Iha 22 Jullu 2024, Tribunál Judisiál Primeira Instánsia Baukau prezide leitura akordaun ba krime arma brankas ne'ebé envolve arguidu Norberto da Silva Perreira hasoru Estadu RDTL, iha Aldeia Bee moris, Suku Fuiluru, Postu Lospalos, Munisípiu Lautem.

Akuzasaun Prokuradór

Prokuradór akuza katak iha 27 Outubru 2022, iha oras tuku 11:00 kalan, arguidu kaer ho samurai lao hamutuk ho nia kolega sira ba testemuña nia fatin hodi husu tuir ofendidu kona-ba nia alin Tomy nia moras no se samurai ba testemuña hodi dehan "*hau nia alin mak mate ne'e ita mate hotu,*". Antes ne'e, sira diskute malu kona-ba ofendidu mak halo ai-moruk ba arguidu nia alin.

Prokuradór akuza arguidu kontra artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon no Kinta Alterasaun Kódigu Penál.

Produsaun ba prova sira

Iha prosesu julgamentu, arguidu deklara katak momentu ne'e kaer samurai ba husu tuir de'it kona-ba nia alin moras maibé la se samurai ba testemuña, arrepende ninia hahalok, foin primeiravés mai hatan iha tribunál.

Alende ne'e, testemuña Marito Correia nu'udar viziñu depoimentu katak arguidu ba ho nia kolega sira ba husu dehan hau mak halo ai-moruk ba nia alin nune'e arguidu se samurai ba iha testemuña nia hirus matan mak dehan "*hau nia alin mate ita mate hotu,*",

Alegasaun finál

Prokuradór haktuir katak testemuña konfirma faktu sira iha akuzasaun katak arguidu uza samurai se ba testemuña nia hirus matan hodi dehan "*hau nia alin mak mate ita mate hotu,*", arguidu nia aktu priense krime arma brankas ne'ebé imputa ba nia, tanba ne'e husu ba tribunál atu kondena arguidu ho pena minimu hosi krime ne'e suspende nia ezekusaun ba períodu hanesan.

Entretantu, defeza haktuir katak arguidu deklara katak momentu ne'e kaer samurai ba husu tuir de'it kona-ba nia alin moras maibé la se samurai ba testemuña, arrepende ninia hahalok no foin primeiravés mai hatan iha tribunál, tanba ne'e husu ba tribunál fó pena justu ba arguidu.

Desizaun

Depoizde avalia faktu sira hotu, tribunál prova katak arguidu uza samurai hodi ameasa testémuña.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>